



Fasnacht 2012



Basler Bebbi Alti Garde

## «Ça süffi alors!»

**Mir Bebbi sage's syt vyyle Joor:  
Vous, les rambasses, ça süffi alors!**

Kensch' dä Kanton in uns'rem Land,  
wo allgemein als stuur bekannt  
und usserhalb vo uns'rem Land  
au no als gyyzig wältbekannt?  
Waisch weele Flägge ich doo main  
wo hinterhältig und gemain  
sich um d'Partnerschaft foutiert,  
nüt gitt, nur nimmt und profitiert?  
Es isch e Laferi-Verein.  
Ärnscht nääh kaasch vo dääne kain.  
Si dräume vo dr Hülfeschanz,  
doo z Basel intressiert's kai Schwanz.  
Ihr schlöön uns immer meeh uff's Gmiet,  
ihr Spar-Büffel vom Baselbiet.  
Ihr sinn vo vorgesch, nit vo morn,  
lääbet in Missgunscht, Nyd und Zorn,  
lieber dien ihr untergooh,  
als mit uns Basler neu aafoo.  
Drum gänn d Bebbi jetzt bekannt,  
mir hänn gnueg vom Baselland!

**Für d'Koexischstänz sinn ihr e Gfoohr!  
Vous, les rambasses, ça süffi alors!**

Mit euerem Rotstab-Bluetsymbol  
isch's uns in dr Stadt nümme wohl.  
Es zaigt dä Stab, so grausam rot,  
dass eure Bluetdrugg vyyl z'hooch stooht.  
Ihr hänn syt achtzäähdredryssig  
ai Vision und die macht is schyssidig:  
Und die schlägt au kai Gaiss ewägg,  
nüt gää und lääbe, wie d'Maade im Spägg!  
Syt 1833 duurt's jetzt aa,  
dass me mit Eych nit rede kaa!  
Mir hänn uus däm Fiasko glehrt,  
ihr, euch buur-stuur numme gwehrt.  
Wie ihr uns bschysset und schmarotze,  
isch noodisnoo aifach zem Kotze.  
Hemdsermli Mischstogg-Kannibale,  
wo umsverge nüt wänn zaahle.  
Ein Ruf durch unsere Reihen hallt:  
Mer hoole, was is ghört, mit Gwalt!  
Und gänn doo fasnachtziell bekannt:  
D Bebbi stürme s'Baselland!  
ES ISCH E GRÜÜZ MIT EUCH UND BITTER  
MER GRIFFE A MIT GRÜÜZ UND RITTER!!!  
Und wenn ihr uns denn wittere,  
no wärdet er nur no zittere,  
vo Rammelburg bis Tittere.  
Mir interniere Euch mit Gwalt,  
gschlosse in e Rotstab-Aastalt,  
wo me euch duet dääglig schlyffe,  
bis ihr „Gäh kunnt vor näh“ begryffe.  
S git nüt anders als umerzieh,  
anderscht kapiere ihr das nie,  
erscht wenn er's eventuell kapiere,  
kaa me Euch denn integriere.  
Ihr miend au kai schlächt Gwüsse ha  
für das, miesstet er jo z'erscht ains ha...

**S'isch gnueg Heu dunde und s'isch woohr,  
Vous, les rambasses, ça süffi alors!**

S einzig, wo mer gmainsam hänn,  
schwachi Politiker - baidi hänn.  
Dr Gysi vo dr Handelskammer,  
goohet under als Windfahne-Jammer.  
Dr Wiehtrich, au stuur wiene Bogg,  
isch für d Kultur e Rieseschogg.  
Bym Zwick doo kaasch's in Marmor meissle,  
dr letscht Zwick het er an dr Geissle.  
Pegoraro, Miesch und Baader,  
sinn politischi Hinterlaader,  
und für dr Ballmer, wo si niene wai,  
wär au dr grööscht Rettigsschirm no z'glai.

**S'isch, wie's isch und es isch woohr,  
Vous, les rambasses, ça süffi alors!**

Mer sin parat mit Witz und Schleudere,  
Attacke loos, kai Zyt vergeudere.  
Mer bsetze dr ganzi Wartebärg  
mit hundertduusig Gartezwärg.  
Nur s Rotlicht-Milieu diemer rette  
mit siebe-acht Verkehrs-Kadette  
und löhn is, falls es denn sott rägne,  
vo Nonne z Mariastai no sägne  
und opfere – dasch au für uns e Säge,  
in ere erschte Wälle d Waggiswäage  
und bloose euch Rammel zimmlig barsch,  
mit eure Gugge dr Rammel-Marsch!

Villicht macht alles gar kai Sinn,  
denn ihr sinn jo für uns kai Gwinn:  
drum Rammel - blyybet woner sinn!

D Ladäärne-Uustellig uff em Minschterplatz und d Waage- und Reggwisyte-  
Uustellig bi dr Kasäärne sin vom Määntig znacht bis am Mittwoch demoorge!

Druck: Thoma AG, Basel